

## *Акафист святым Вифлеемским мученикам младенцам от Ирода избивенным.*

### **Кондак 1**

Избранный соборе мучеников, во младенчестве за Христа пострадавшие, молитися усердно о чтущих святую память вашу и тако вам с любовью вопиющих: Радуйтесь, мученицы непорочнии, младенцы Вифлиемстии.

### **Икос 1**

Ангельский собор земных ангелов зряще, младенческим незлобием злобу демонскую, чрез Ирода явленную, победивший, умиляемся сердцем, таковая им воспевающе: Радуйтесь, ангели юдоли земныя: радуйтесь, бисери Рождества Христова; Радуйтесь, зерцала непорочности; радуйтесь, благоухание незлобия; Радуйтесь, мученицы непорочнии, младенцы Вифлиемстии.

### **Кондак 2**

Видяще ваша телеса, яко жертву благоуханную, за Христа пострадавшия, горце родителие ваша и сродницы со слезами воспеваху Богу: Аллилуиа.

### **Икос 2**

Разум наш помраченный просветите младенцы святии, да злого отбегнути навыкнем и ко благому тщание имети будем мы, ныне вас тако славословящия: Радуйтесь, младенцы святии; радуйтесь, сонме богоизбранный; Радуйтесь, звезды земнии; радуйтесь, цветы прекраснии;

Радуйтесь, мученицы непорочнии, младенцы Вифлиемстии.

### ***Кондак 3***

Сила Всевышняго в немощи вашей явленная посрами сильных века сего, вас бо избившия жестоковийнии мучителие, Спасителя мира убиты жестоковыйнии не возмогоша. Мы же за сие прославляем Бога пением: Аллилуиа.

### ***Икос 3***

Имуще вас теплейших молитвенников и предстателей ко Господу усерднейших, восхвалям Творца Бога, вас же превозносим тако:

Радуйтесь, за Христа пострадавшии;

радуйтесь, Ему ныне предстоящи;

Радуйтесь, со ангелы ликовствующие;

радуйтесь о нас тепле молящиеся;

Радуйтесь, мученицы непорочнии, младенцы Вифлиемстии.

### ***Кондак 4***

Буря скорби постиже живущих в Вифлиеме Иудестем и во всех пределех его, они бо реки крови ваша зряще, в скорби велией взываху Богу: Аллилуиа.

### ***Икос 4***

Слышаще словеса пророка яко глас в Раме слышан бысть, плач и рыдание и вопль мног: Рахиль плачущися чад своих, и не хотяще утешитися, яко не суть, тако глаголем:

Радуйтесь, лучи Солнца Правды;

радуйтесь, пророчества Иеремиинаго исполнение;

Радуйтесь, родителие и сродницы оплакании;

радуйтесь, Творцем мира утешении:

Радуйтесь, мученицы непорочнии, младенцы Вифлиемстии.

### **Кондак 5**

Боготечныя звезды на тверди небесней блистающии, святии мученицы младенцы, помяните у Престола Господня всех чтущих память вашу и вопиющих о вас Богу: Аллилуиа.

### **Икос 5**

Видяще на земли новыя Ироды людей убивати своя чада во чреве понуждающия, возводим очи своя горе и просим помощи вашея, да избавите от пагубы сия всех глаголющих вам тако:

Радуйтесь, помощницы богодаровании;

радуйтесь, заступницы скоропослушливии;

Радуйтесь, утешающии скорбныя;

радуйтесь, утешающии печальныя;

Радуйтесь, мученицы непорочнии, младенцы Вифлиемстии.

### **Кондак 6**

Проповедницы младенческаго незлобия, святии мученицы Христовы, потребите молитвами вашими ожесточение сердец наших, да в чистоте сердца возносим молитвы Господеви, поя Ему: Аллилуиа.

### **Икос 6**

Возсия во всю землю слава страданий ваших, святии младенцы Вифлиемстии, от востока до запада вернии бо чтут святую память вашу и вопиют тако:

Радуйтесь, милосердия источницы;

радуйтесь, любовью озаряющии;

Радуйтесь, мученическаго лика украшение;

радуйтесь, земныя юдоли радование;

Радуйтесь, мученицы непорочнии, младенцы Вифлиемстии.

### ***Кондак 7***

Хотяще спасти души своя, прибегаем к теплomu заступлению вашему, мученицы младенцы, да ходатайством вашим избегнем вечнаго мучения и сподобимся пети Богу песнь: Аллилуиа.

### ***Икос 7***

Новых сотворите нас, младенцы святии, древняго зла избавивше. Да ревностно поработаем Господеви и воспеваем вам сия:

Радуйтесь, ликование праведных;

радуйтесь, благоухание святыни;

Радуйтесь, животворнии источники;

радуйтесь, сосуди благодати;

Радуйтесь, мученицы непорочнии, младенцы Вифлиемстии.

### ***Кондак 8***

Странное чудо является всем притекающим к вашему заступлению, святии мученицы младенцы, многомошным бо предстательством от бед избавляете всех верно вопиющих Богу: Аллилуиа.

### ***Икос 8***

Весь мир во зле пылаемый на верныя ополчишася, вы же предстателие наши теплейшия от козней его избавити всех тако вопиющих во умилении вам сия:

Радуйтесь, наше ограждение от зла;

радуйтесь, потребление вражеского коварства;

Радуйтесь, исцеляющи от злобы;

радуйтесь, избавляющи от страстей;

Радуйтесь, мученицы непорочнии, младенцы Вифлиемстии.

### **Кондак 9**

Всякое коварство демонов лукавых отжените от нас, святии мученицы младенцы. Мы же Вашими молитвами ограждаеми немолчно славословим Творца песнию: Аллилуиа.

### **Икос 9**

Ветия многовещании и тии не возмогут по достоянию изобразити небесную славу вашу, святии младенцы. За Рождшагося от Девы бо пострадавше, ныне Ему предстоите в молитвах своих воспоминающе всех чтущих вас сими словесы:

Радуйтесь, очищающия от скверны греховныя;  
радуйтесь, наставляющии богоугодному житию;  
Радуйтесь, яко вами духовне возвеселяемся;  
радуйтесь, яко вами добре просвещаемся;  
Радуйтесь, мученицы непорочнии, младенцы Вифлиемстии.

### **Кондак 10**

Спасите от погибели, святии угодницы Христовы, отроки и отроковицы, греховными нравами растлеваемии, да навькнут добродетелем и воспоют верно Творцу и Богу своему: Аллилуиа.

### **Икос 10**

Стеною молитв ваших оградите юноши и девы от растления греховнаго, умы их светом истины просвещающе, мы же тако вам вопием:

Радуйтесь, благоугодное услаждение;  
радуйтесь, мудростию напоение;  
Радуйтесь, юных сердец защищение;

радуйтеся, юных умов просвещение;  
Радуйтеся, мученицы непорочнии, младенцы Вифлиемстии.

### ***Кондак 11***

Пение Пресвятей Троице со святыми и ангелы совершающе,  
помяните нас, угодницы святии, да купно с вами во веки  
будем восхваляти Господа песнию: Аллилуиа.

### ***Икос 11***

Светозарнии камение драгии мученицы младенцы  
вифлиемстии, на тверди небесней благодатию сияющии,  
восхваляем ныне вернии, тии бо молитвами своими от бед и  
скорбей избавляют всех, тако им зовущих:

Радуйтеся, Творцем увенчании;  
радуйтеся, ангелами прославляемии;  
Радуйтеся, верными воспеваемии;  
радуйтеся, нами ныне ублажаемии;  
Радуйтеся, мученицы непорочнии, младенцы Вифлиемстии.

### ***Кондак 12***

Благодатное воинство, в земней юдоли сущих от козней духов  
нечистых ограждаемии, ныне зрим вас, мученицы младенцы,  
в радости о сем благодаряще Бога ангельскою песнию:  
Аллилуиа.

### ***Икос 12***

Поюще вам песни похвальнии, мним вас быти заступники  
нашими, да не порадуется сила бесовская о погибели тех, иже  
с верою и любовью тако вам во умилении вопиют:

Радуйтеся, матерей детородящих покровители;  
радуйтеся, младенцев от бед оградители;  
Радуйтеся, яко вами Имя Божие прославляется;  
радуйтеся, яко вами райстии обители украшаются;

Радуйтесь, мученицы непорочнии, младенцы Вифлиемстии.

### **Кондак 13**

О, святии младенцы мученицы, явите милость свою на всех, иже верою и любовью чтут святую память вашу и вопиют верно о вас Богу: Аллилуиа.

*(Этот кондак читается трижды, потом Икос 1 и Кондак 1)*

### **МОЛИТВА**

О, святии мученицы, младенцы Вифлиемстии, ублажаем ныне страдания ваши, за Рождшагося от Девы понесении, славословим чистоту душ ваших, юже ко Престолу Господню, яко жертву благоуханную принесли есте, воспеваем небесную славу вашу, ею же райстии обители озаряете. О, святии младенцы, призрите с небесныя высоты на мужи и жены, во гресех потопляемии, на юноши и девы, смрадом греховным растлеваемии, на отроки и отроковицы, мерзостем греховным научаемии, на младенцы, родительми оставлении и во утробах еще сущих, ко убиению приуготовлении.

Вознесите молебный вопль ваш ко Престолу Христа Бога, Его же ради во младенчестве убиение от Ирода нечестиваго претерпели есте, да помилует всех Рождшийся от Девы и от погибели вечныя избавит, младенцы же, во утробах сущих, от убиения да избавит.

Вемы бо вемы, угодницы Христовы преславнии, яко многомошна молитва ваша пред Богом, сего ради, уповающе на милость и любовь вашу, прибегаем ко многомощному предстательству вашему и просим не оставити нас в гресех погибающих. Приведите молитвами своими всех нас ко богоугодному житию и сподобите в будущей жизни небесного наслаждения и райских обителей, идеже вечно воспевается Имя Пресвятыя Троицы, Отца и Сына, и Святаго Духа.  
Аминь.